



鉸頭髮

自細漢阮就罕得去電頭髮店予人鉸頭髮，見擺若是學校欲檢查頭毛，阿母就會工課放咧，叫阮三姊弟仔坐踎椅條，逐個人提一張中央挖空的報紙橐咧，聽候阿母「開工」。

阿母會先對阮兩姊妹仔開始，因為查某囡仔的頭毛規定上長干焦會當佢耳珠齊，額頭的頭髮要離目眉頂一公分。阿母跤手誠猛掠，鉸刀小可仔振動一下，一睏仔就鉸好勢矣。小弟的較麻煩，愛用攄仔先攄做三分仔，才閣用剃頭刀共毛跤副過，剃一粒頭著愛半點外鐘。

讀國中的時陣，阿母日時佇鞋仔廠上班，暗時閣去合作農場洗芹菜，逐工無閒甲無暝無日，就叫阮家己鉸。我佢小妹兩個人互相鉸，小弟的頭無人會曉剃，就提錢去揣剃頭店的師傅。有一擺，小妹無細膩共我後壁的頭毛鉸甲缺一角，隔轉工去學校予人笑講「去予狗嚙著」。自彼擺了後，若是欲鉸頭髮，我就會三叮嚀四吩咐，叫小妹毋通共我鉸耪去。

大漢出社會了後，阿母就毋捌閣共阮鉸頭毛矣，顛倒是三不五時，阿母會叫我共伊的頭毛略仔修予順。小弟佇臺北趁食，見擺若去予人鉸頭髮攏無滿意，因為伊去種著阿母的虬頭毛，若鉸無好勢就會髦甲若棕鑢仔。噴水、用捋仔捋，抑是用吹風機吹，攏無效，誠費氣。伊定定舞甲想欲攄三分仔，毋過閣無勇氣。

有一回伊歇睏轉來厝，我看伊規粒頭敢若鳥仔岫咧，就問伊欲予我鉸頭髮無？想袂到伊竟然應好，我就開始攢家私。我寬寬仔鉸、杳杳仔修，舞欲規點鐘久。等小弟的頭洗好，吹焦了後，阿爸、阿母看著，竟然呵咾伊變足緣投，閣講我會當出師矣。後來小弟共我講，個同事攏講伊這擺頭髮鉸了誠好看，拍層拍了誠順，閣相爭問伊是佢一間鉸的，個嘛想欲去。

這馬，我會共我的後生、查某囡剃頭，雖然個一半擺仔會嫌我跤手慢鈍，剃頭的時陣身軀誠刺疫，毋過看個鉸好了後輕鬆的款式，我心肝內就會感覺誠滿足！

作者：程惠如

☆詞彙學習☆

【耳珠】hīnn-tsu/hī-tsu：耳垂。

【攄仔】lu-á：推剪頭髮的器具。

【毛跤】m̄ng-kha：毛髮的邊際。

【副】khau：削、刮。

【慢鈍】bān-tūn：遲緩、遲鈍。

【刺疫】tshiah-iàh：各種不舒服、不愉快的感覺。